



Junta General del Principado de Asturias

A LA MESA DE LA XUNTA XENERAL

Los Grupos Parllamentarios Socialista y Convocatoria por Asturias IU - Más País - IAS, al traviés de los sos respectivos Portavoces, Dolores Carcedo y Javier González Vegas, al amparu de lo dispuesto nel artículu 216 y siguientes del Reglamentu de la Cámara, tienen l'honor de presentar la proposición non de llei que sigue pal so debate nel Plenu.

ESPOSICIÓN DE MOTIVOS

El 20 de febreru pasáu, viéspora del Día Internacional de la Llingua Materna, constituyóse en Bimenes el Conseyu de la Rede de Servicios de Normalización, integrada por más de 40 conceyos y entidaes. Con esti motivu, el Conseyu fizo una declaración de reconocimientu de les llingües propies d'Asturies, l'asturianu y l'leonaviegu, como "derechos culturales inherentes, dao que la llingua materna entiéndese como un derechu a acceder y participar na herencia cultural colectiva que tanto l'asturianu como l'leonaviegu representen". Un reconocimientu que, según la *Declaración de Bimenes*, "pasa pela declaración d'oficialidá d'estos dos idiomas, pa que tengan les mesmes condiciones que'l restu de llingües oficiales d'España".

Como se recueye nel documentu, n'Asturies conviven güei con naturalidá trés llingües: el castellanu, oficial en tol Estáu, y l'asturianu y l'leonaviegu, llingües propies que cuenten con un fondu arraigu na historia, na cultura y nes tradiciones d'Asturies y tresmítense de xeneración a xeneración vertebrando la nuestra identidá colectiva. A estes trés llingües, que conviven ensin que l'usu o la promoción d'una suponga un detrimentu d'otra y representen un valiosu patrimoniu cultural qu'arriquez a la nuestra sociedá, hai qu'añader la presencia d'otros idiomas, resultáu de la inmigración recién, qu'añaden a la nuestra comunidá capes adicionales de diversidá.

Na *Declaración de Bimenes* reconozse la diversidá llingüística como una oportunidá y señálase la importancia de desenvolver acciones de política llingüística que salvaguarden les nuestres llingües y garanticen los derechos culturales de les persones: "l'oxetivu de la política llingüística y de la normalización ye garantizar que toles llingües tengan les mesmes oportunidaes d'usu y

desarrollu, reconociendo'l so valor intrínsecu y la so contribución al arguyu d'asturianía. Y especial atención merecen aquellos que s'alcuentren minorizaes y amenazaes, como ye'l casu de l'asturianu y l'eonaviegu". Nesi sen, "el respetu a les llingües d'Asturies supón un compromisu cola igualdá dientro de la diversidá y sitúa al asturianu y al eonaviegu como elementu cohesivu y distintivu de la comunidá autónoma, merecedor de protección y promoción como tesoru cultural vivu".

La *Declaración de Bimenes* ye "úa chamada al diálogu y al consensu, pra qu'el asturiano y el eonaviegu ocupen el llugar que ye corresponde en todos os ámbitos da vida pública y privada da ciudadanía asturiana", pa lo qu'insta a trabayar "pra qu'as nosas lenguas propias sigan llatindo nel corazón d'Asturias, como símbolu da nosa identidá y como ponte hacia un futuru de progresu y harmonía". Los firmantes de la *Declaración de Bimenes* animen, en definitiva, a "actuar con visión y coraxe, pra qu'as xeneracióis futures hereden úa Asturias unde a diversidá llingüística seña de verdá festexada como un dos sous mayores tesouros".

Por tolo espuesto, los Portavoces de los Grupos Parllamentarios Socialista y Convocatoria por Asturias IU-Más País presenten pal so debate nel Plenu la siguiente

PROPOSICIÓN NON DE LLEI

Primeru. La Xunta Xeneral del Principáu d'Asturies adhiérese a la *Declaración de Bimenes del Conseyu de la rede de normalización llingüística en defensa de les llingües propies d'Asturies con motivu del Día Internacional de la Llingua Materna*.

Segundu. La Xunta Xeneral del Principáu d'Asturies insta al Gobiernu del Principáu a aplicar la *Declaración de Bimenes* y cumplir colos oxetivos y propuestes nella recoyíos.

Palaciu de la Xunta Xeneral, 26 de febreru de 2024

Dolores Carcedo García
Portavoz

Javier González Vegas
Portavoz